

重修兩淮鹽法志

兩淮鹽法志卷四十九

轉運門

總棧四

淮北西壩

道光十五年十二月署海分司謝元淮稟整頓北鹺各條
內稱西壩順清河爲票鹽總埠試行之初卽奉檄行不
准設立鹽行名目慮其把持爭占祇准開設棧房聽民
販隨意堆儲交易甚便並無順清河設棧之事本年春
月吳家集三尖子等路私鹽透出欲避西壩而就湖船
在彼發賣票販亦往爭售無論其地霍狹左湖右河淹
消可慮且開棧房者多係地方匪類句串湖船先兌鹽

上船然後交價動輒脫空中飽爲害甚鉅應請申明舊章嗣後票鹽俱在西壩交易其順清河止許過載不准堆棧所有私開各棧一概勒歇並飭知清河縣並順清河委員隨時稽查遇有私棧立時拆毀以淨根株經署鹽政林則徐批查淮北改行票法以來至今甫屆四次奏銷除江運各岸不計外已行一百五十萬引按額計算溢請過多各州縣岸銷有定何能逾額暢行無怪鹽壅價平致爲票販之累據稟見應堵緝場私使無透漏清丈鹽池使無溢產歸局捆運使無擡價而尤應以疏銷岸鹽爲先務之急等情所議均屬允協本署部堂細

加酌核如所稱正陽關順清河應行整頓一切查票鹽經過地方毋許地棍匪徒私設鹽行把持漁利經陶部堂飭禁在案若如該分司所稟正陽關有地匪假託錢店私開鹽行把持拖騙重租稱收暨順清河亦有匪類設立棧房勾串湖船愚弄票販實屬爲害甚鉅候卽申明舊章出示嚴禁並札鳳陽府正陽關通判將私開鹽行之人勒令閉歇訪拏究治及札清河縣將順清河私棧一概勒歇仍會同順清河委員隨時稽查該處止准過壩不准堆棧遇有私棧立時拆毀以淨根株又所稱繳票限期一節票販運鹽出場起棧待開本自需時勢

不能盡在限內到岸繳票亦屬實情自應以順清河委員截第四角之日起限以昭核實而免訛索候卽一并出示通諭並札皖豫行票各州縣一體遵照仍候飭行中河廳每遇雙金開啟放下板之期務於十日前移會該分司傳諭各商販按時起運俾免中道阻攔之慮

道光十五年十二月署鹽政林則徐示票鹽出場須於西壩堆儲待雇湖船其堆儲棧房聽民販自賃不准地棍阻指至順清河並無准其設棧之事茲據海分司稟吳家集三尖子等路開有棧房多係地方匪類勾串湖船先兌鹽上船然後交價動輒脫空中飽爲害甚鉅等情

查地棍私立棧房脫騙鹽價已屬有累民販若透出私
鹽徑上湖船一時稽查不密尤爲票法之害合亟嚴行
飭禁以保販本而利運行為此示仰順清河私闖鹽棧
及票販人等知悉示到各該棧房務卽遵照一概閉歇
嗣後不許再有私開其各票販運出引鹽只准在王營
堆儲不得復運順清河私售至順清河地方祇許過載
不許堆棧如敢故違均卽分別拏究決不稍從寬貸懌
之愼之

謹按此爲西壩設棧之始

咸豐十年四月海分司陳照委員杜文瀾會稟西壩本有

錢糧局扣收稅課方准開除應請嗣後運鹽到壩仍將大票呈投官局出售之後提扣課銀雖售由販便價須局定一如淮南總棧之式派令殷實票商在局經理查核銷數暢滯分別上中下鹽色酌定價目每日牌示以歸畫一應解餉鹽亦應由局均勻攤派按數提解庶免偏枯經運司喬松年批准

同治四年正月海分司沈炳稟奉頒發淮北新章改收見課條內飭令卑職駐紮西壩或改駐楊莊經理發販收課事宜卑職查西壩爲票鹽總匯之區祇緣無多房屋可賃板浦衙署又被西捻竄擾焚毀過半難期修復今

既奉飭移駐自應在於西壩起造新署業於議復新章
應辦事宜稟內聲明移駐日期一面擇地趕造房屋以
資辦公在案旋卽擇地購辦新舊木料並督帶匠役查
估據各匠役稟稱以西壩地近黃河沙土虛鬆若全蓋
瓦屋非於地內密釘木椿不能建造否則鎮壓日久必
致走動歪斜且地工較鉅所需磚瓦買運尤爲不易等
語卑職復查無異當於五月二十七日擇期開工見將
上房五間大堂捲簷三間磚牆瓦蓋其餘房屋因瓦房
工程浩大均係仿照西壩各局棧房砌以笆牆蓋以柴
蓆其裝修木料粉飾油漆仍與瓦屋相同籌節督辦工

堅料實統計建造房屋七十五間實用工料足錢七千八百二十一千五文合庫平銀五千五百八十六兩四錢三分於本年正月十五日一律工竣業於上年十二月十五日移於新署辦公經鹽政曾國藩批查板浦地方本有海分司衙署前飭該分司駐紮西壩自應租賃公寓並未令建衙署卽該分司議覆新章稟內亦祇稱擇地造屋以資辦公得有十數間爲彈兌錢糧之地儘足敷用乃該分司率行建造七十餘間又不先具專稟請示忽於事後希冀開銷經費至五千五百餘兩之多實屬荒謬當此帑項萬分支絀淮北經費得有盈餘亦

須解充軍餉豈容任意冒銷冊開工用銀兩無論是虛是實絲毫不准動支公項應由該分司全數罰賠以爲擅自興工者戒所有已造衙署體制並應拆改公局以免違制而干吏議

同治五年二月海分司沈炳復稟查西壩建造房屋事出因公旣奉批駁何敢復有所請惟自改新章團練緝費等款均已全裁卑衙門除養廉外僅有引費一款已屬不敷辦公經費旣不准動用鉅款又驟難賠繳房屋乃辦公要地一切案卷全行在壩卽不建造亦須租屋而居况徵收見銀司事家丁書役人等倍於曩昔西壩無

此寬大之公局將來後任亦所必需今擬請將前項動
用經費庫平銀五千五百八十六兩四錢三分在於海
分司養廉內無分正署分作十年攤扣歸款如蒙照准
立案卽於奉批之日起攤經運司丁日昌批允

同治五年二月西壩卡委員詳海分司西壩見設鹽棧十
五家所有到壩之鹽向由票販自行分派堆儲惟鹽存
棧內待售需時課款攸關商本所繫若不詳定章程明
以限制誠無以示懲勸溯查道光年間改票極盛之時
每年運鹽四十六萬引鹽棧僅止數家續後增至二三
十家紛紛虧歇累及商販近年軍興以後鹺務疲滯今

甫稍有轉機每綱運鹽二十九萬餘引計以十五家分儲此中切實可靠者固不乏人而成本空虛者或借名湖欠或暗換低銀或跌價搶售種種貽累大局卑職等時加防範雖已斂迹誠恐日久懈生應請嗣後遇有前項情弊立將該棧封閉詳辦不准更名復開務使各守功令各顧身家如果自行閉歇者亦使有減無增將來如添額引再行察看情形核辦以每綱均攤九萬包爲率仍須連環互保以昭慎重經海分司轉詳運司批准立案

同治五年八月海分司沈炳稟據西壩正辦卡員候補大

使周楨幫辦卡員候補大使唐人鑑稟稱查淮北所設各卡掣驗全綱票鹽以西壩大伊山順清河三處最爲緊要是以大伊山順清河委員卡所向係經費項下動支銀兩建造辦公至西壩卡前有大王廟可以借住作爲公所惟該廟自遭捻匪以後已屬破敗不堪本年夏秋雨水過多四面牆壁塌卸風雨難蔽倒壓堪虞勢難棲止辦公見在順清河卡奉文移駐十二堡是後之鹽河前之黃河全綱引鹽入棧出棧卑卡責任尤重必須駐於適中之地方期照料周妥茲查有閉歇之六合棧空房九間擬連地基給價買定添造茅屋五間作爲西

壩辦公之所統共需銀二百五六十兩實屬一勞永逸
茲先具稟陳明可否俯賜據情轉詳運憲准其援案在
經費項下動支趕卽購造庶卑卡正副二員稽查東西
各棧票鹽出入截角蓋印一切事宜辦理不致歧誤等
情查該員所稟均係實在情形所需經費爲數無多似
應於適中之地趕爲建造以資辦公經署運司程桓生
批允

同治六年十一月鹽政曾國藩札照得淮北票販與湖販
脣齒相依湖販利微壩銷必滯此一定不易之理見在
西壩售價每包漲至一兩二錢較刊章定價提增四錢

之多票販獲利太厚湖販因壩價日增成本日重運鹽至正陽銷售沾利甚微兼之銀價陡漲皖豫水販赴督銷局買鹽計銀雖不見增計錢每包暗增七八百文若不將壩價核減必致湖販裹足貽誤餉源本部堂酌定應將見售一兩二錢之壩價減去二錢五分次色每包不准跌至九錢五分以上上色每包不准增至一兩以外以輕鹽本而廣銷路

同治八年十一月淮北督銷委員李春棠詳岸價與壩價表裏相因壩價日增則商本過重岸價過漲則轉運維艱見在湖販運鹽一包行到正陽其鹽本腳費釐金成

本已在二兩一二錢而住日月息之費尙不在內則遵
價出售必須實有三錢盈餘始可稍沾微利而上游買
客轉運分銷必就正陽岸價再加腳費釐捐以次遞增
兼之上游出賣均係按斤收錢正陽販運照銀作價上
游銀價一昂正陽銷市卽滯若正陽岸價過漲則來客
更稀且恐民間食貴轉而行私於壩銷岸務均有妨礙
仰懇札飭海分司轉飭西壩鹽棧著實照章平減庶販
運利於轉輸窮民不苦昂貴至豫販自運守輪上駛係
初設督銷時稟定章程迨後稟請停止上駛未及稟停
下赴西壩相沿至今豫販仍然赴壩捆鹽及到正陽不

准上駛遂生自買之弊而行用撥船一切花費較尋常
更多花費既多怨言卽起在該販初不自知爲壞法亂
紀自取咎戾但覺轉輸之不便耳竊維北鹽銷市以豫
境爲最年來軍務平靖豫販復業者多若再禁止下駛
恐致有礙壩銷若仍阻截上游未免日滋流弊蓋商情
樂於轉運釐餉利在流通可否懇恩准復自運舊章凡
豫販自行赴壩捆運者其下駛時由行出具保結赴局
挂號驗資捆鹽回到正陽挨輪上駛但旣責成行戶認
保仍照舊章准給行用一半如查有通同冒混者卽惟
具保行戶是問經鹽政馬新貽批西壩售價暗增洵於

湖販成本銷路均有窒礙前已札飭海分司出示平減
究竟見在壩價每包實售若干候再催令據實稟復至
豫販自備資本赴壩捆鹽舊章本聽其便至鹽抵正陽
前令與眾販挨輪售賣未免強以所難遂致有賄通行
戶自買之弊自應變通章程此後豫販自運之鹽下駛
時由行出具保結赴局挂號其捆鹽回到正陽仍照舊
章與眾販一律挨輪到輪時准其原船上駛不必定在
正陽售賣似於商情爲便惟不得將自運之鹽另再提
輪並嚴查通同冒混之弊以杜取巧至驗資一層弊端
甚多斷不足靠應毋庸議

同治九年十二月海分司許寶書稟伏查西壩票鹽售價
自奉憲臺核定上色每包以一兩爲度下色每包不准
跌至九錢五分以裏各販皆遵定章交易數年以來未
敢暗中增減惟自兵燹之後湖販元氣未復見係小本
營運者居多來壩買鹽類皆搭貨而貨物間有低劣互
相議論價值參差在所不免至於見銀交易者則仍照
定章每包售銀一兩上下並無暗中提增情事至場竈
私鹽似難禁其顆粒不透然自本年夏間稟請添派巡
勇委員堵緝之後尙爲得力本年各卡緝獲私鹽計共
八十二萬餘斤爲從來未有之多均經報明運司在案

見在大夥私梟皆已斂迹仍由卑職嚴飭各卡員弁認真巡緝不准虛應故事以靖私源而暢官引經鹽政曾國藩批據稟已悉仰仍嚴加稽察不准私自增跌自壞藩籬一面轉飭場委各員認真巡緝毋稍懈怠

同治十二年三月署鹽政張樹聲札運司本署部堂訪聞淮北鹽務積弊約有四端應由該司查照後開款條遴員確查革禁以肅鹺政 一淮北票鹽在西壩出售曾前部堂定章上色每包不得增至一兩以外次色每包不得跌至九錢五分以內係核計票販本利酌定不准私長私跌近年壩價逐漸增擡有售至一兩二錢以上

者而正陽售價僅祇二兩二錢尙須搭易貨物湖販獲利較薄近聞海分司出示平價祇准照章每包售銀一兩各票販因成本逐漸增重噴有煩言均屬未得其平應由司派員赴壩確查票販湖販成本酌中另定公平售價稟請出示曉諭遵辦 一場下局卡陋規及池商貼斤貼色名目久奉禁革近年票販售價日高池商借詞勒捐往往於定價每引八錢之外另索加一二錢方予先捆如票販欲捆上色之鹽或須額外加湊耗鹽數斤者均須另給貼費經過局卡掣驗均視斤兩之重輕索陋規之多寡票販成本暗增不得不擡高售價今欲

平壩價必須先革黑費並須略增池商鹽價永杜加耗
貼色等名目應飭司一面查禁一面妥議詳辦 一淮
北票鹽由場運壩定章每包連包索溷耗一百十斤係
奏定之案近年逐漸加增竟有捆至一百十五斤以外
者此弊最爲鹽務之害若不從嚴查禁誠恐日甚一日
於課釐銷鹽大有關礙應由司轉飭海分司督同局卡
各員認真嚴查如局卡委員陽奉陰違一經訪查確實
定卽撤參 一淮北各場至皖北各州縣地方水陸紛
歧私鹽充斥應由司派員查勘情形何路係走私要隘
何路應派兵嚴拏酌議堵緝章程切實詳辦不得虛應

故事

同治十二年五月海分司于寶之等稟復奉飭會查淮北情弊核擬章程四條

同治十二年五月運司方濬頤詳竊奉前憲張札開整頓北鹽四條當經派委候補運判張元愷會同海分司于寶之按款查禁議詳去後又奉憲台批本司詳據海分司請酌加票販壩價場商鹽駁價由奉批查西壩售價近年每包竟有一兩二錢以外者各票販暗中私擡實屬有違定章惟票販成本亦較前加重據稱與曾前部堂定價時情形不同尙屬實情張署部堂前次飭查札

內本令酌中另定公平售價茲據具詳前情本部堂持平酌核所擬上色每包售一兩一錢五分尙嫌浮多應定上色每包不得增至一兩一錢以外中下色每包不准跌至一兩以內自此次批定之後如再暗中增跌察出定行從嚴究辦壩價旣增場商鹽駁價亦應酌加每引八錢五分凡加耗貼色等名目一概革除等因各在案茲據張運判會同海分司稟奉飭查禁各條事非一端弊實相因今欲輕販本宜革場弊但弊貴審因沿委溯原宜從壩始西壩票鹽售價正月間卑職寶之聲明舊章上色每包不得售至一兩以外各販始尙遵章出

售繼因湖販揀選色粒間有得貼價一二錢不等者細
爲體究非重加釐定不足以昭信守是以有請增價之
稟仰蒙督鹽憲李批飭上色每包不得售至一兩一錢
以外中下色每包不得跌至一兩以內當傳集各販飭
令遵章交易不准再有擡價情事場商鹽駁價見奉督
鹽憲批飭定爲每引八錢五分已轉行遵照惟據票販
公同面稟場商經此次加價後核計成本原已優恤但
貼色之名其來已久場商幾視爲固有今欲驟挽積習
似宜示以寬恤使之無可借口從前本有九錢成案請
再加五分復還舊制等語卑職等深加體察此次壩價

場價分別酌加壩價每引奉加四錢場價奉加五分兩相衡較恐場商不能無望蜀之心似宜詳請督鹽憲將鹽駁價仍准復還九錢之例以期永遠遵行等情稟請轉詳前來並會議章程四條 一西壩鹽價見經稟奉督鹽憲批定上色每包不得增至一兩一錢以外下色每包不得跌至一兩以內嗣後票販售鹽自應遵守見章核實交易儻敢於定價之外私自增擡一經查出或被湖販告發初次違章即將該販棧鹽全數封儲俟本綱販鹽售竣方准啟封開售二次違章卽稟請將票引註銷另招接辦棧戶扶同弊混私自增加定將棧房封

開賣手提究懲辦 一垣商鹽駁價見經稟奉督鹽憲
批定每引給銀八錢五分此次票販下場捆鹽場商應
得鹽駁價卽照見章付給儻敢於例價之外私索貼色
准票販指名具稟卽將該垣籤派額引扣除照原派鹽
色分別上中下戶另行改派如係付捆後查出者卽立
案將下綱應派之引扣除一面將本綱原收貼價追繳
充公其奉派後本垣無鹽者卽由票販具稟另行改撥
如有已付鹽價者稟請由官追繳場商索貼其弊已久
經此次嚴定章程之後如有狡猾場商因所欲未遂從
中刁難致誤捆運准票販在場指稟或逕稟卑衙門從

嚴究辦場員失於覺察不行查禁卽照後定局卡掣放
重斤章程辦理局商扶同弊混及票販有所希冀甘於
貼價不行舉首者查出一併照辦 一淮北票鹽每引
例定正鹽四百斤分捆四包每包連涵耗一百十斤不
准額外增多曾奉前爵閣督鹽憲曾頒發刊章並續發
告示有扣罰充公註銷票引之例乃近來票販捆鹽往
往有違定例任意多捆自應重申禁令嚴行查辦如敢
私捆重斤一經掣出除將全船鹽包扣罰充公外並將
該販票引稟請註銷另招接辦以爲漏課舞弊者戒至
掣驗之資本在局卡層層鈐束各有專責大伊山卡爲

全綱票鹽經過之地掣驗尤關緊要自過大伊山後直達西壩向不再掣必得於到壩再行見斤大伊山卡掣驗是否認真方有稽考但普律全掣未免繁而累販應請變通辦理鹽船到壩後由卑職寶之不時親往弔包或派委妥員不拘何販何船隨時抽掣如掣出重斤卽照全票包數扣罰充公並遵照督鹽憲示章將該販票引註銷大伊山掣出重斤亦照此辦理局卡委員以失察重斤之次數定處分之輕重初次記過二次摘頂三次稟撤胸山之鹽向歸板浦場掣放責任與局員相同自應一律辦理局商朦混滋弊初次記大過二次斥革

不准再充稱手得費放斤卽行指提重辦以爲玩法者
戒 一淮北場局各卡掣鹽黑費向有蓋印截角鉤損
幫項損底等名目前於同治四年奉督鹽憲李於運司
任內酌留蓋印截角鉤損三項通飭遵照嗣於五年又
奉前陞憲丁將局卡經費分別酌復前項黑費勒石示
禁概行革除乃日久玩生舊規漸復積習相沿殊爲販
累亟應重申禁令大加整頓見已嚴飭場局卡各員將
各項黑費統行裁革其鉤損一項本係付給捆工人等
之款應飭確查實給數目稟明酌留仍由卑職隨時訪
察如果全綱公事完竣始終清勤力除積習當稟請酌

量獎勵以昭激勸儻竟不知悛悔卽據實稟撤以肅官
方經鹽政李宗義批據詳並章程四條均悉垣商鹽駁
價旣據一再詳請從前本有九錢成案姑准復還每引
九錢以杜暗增惟淮北近來弊端以重斤爲最大鹽旣
任意多捆黑費卽因之而起凡暗增售價及加耗貼色
等名目悉由重斤所致見在壩價及鹽駁價均已從新
釐訂場鹽到壩擬由海分司親往弔包或派員隨時抽
掣局卡委員以失察重斤之次數定處分之輕重果能
照所擬辦法實力舉行則商販自不敢再捆重斤輕於
嘗試重斤除而黑費不禁自革但恐徒託空言則積弊

仍難盡除本部堂惟有密行派員查訪將來查出何項弊端卽惟該分司等是問慎勿輕視

同治十二年閏六月鹽政李宗羲批海分司稟淮北重斤之弊雖經該分司逐船吊包力加整頓而商販惟利是趨查察稍有未周難保不復萌故智該分司卽日以剔弊爲重尙恐耳目不逮日久玩生乃辦理伊始居然稟稱實已革除淨盡本部堂未能深信單稟內稱例外貼色等費絲毫不敢收受且有去年已收之費仍行退還者亦恐未必確實惟鉤損稱手兩項及另稟蓋印截角旣據查明實係付給傭工人等及辦公所需與其革裁

之後仍不免暗中索取姑照所稟酌留其餘各項名目一概革禁仍責成該分司認真稽察本部堂亦必隨時密訪如再陽奉陰違例外需索官則立予撤參商則提轅重懲定當授受同科決不再貸該分司並干未便勿謂言之不預也

同治十二年九月海分司運判于寶之稟據各販稟稱西壩售鹽向憑湖販自行擇選與淮南專辦一場專運一垣專銷一岸情形不同若一挨輪派賣誠恐湖販觀望不前致刻刻有停頓之慮奏銷恐難逐漸提前所關匪細且場河船隻無多若以到壩先後定輪賣次序勢必

搶捆搶運爭先恐後儻場商心生覬覦藉付鹽遲早爲
居奇暗中加貼之弊不免復萌誠如憲諭流弊轉多耳
目恐有不逮因議西壩設立公所輪流稽查章程四條
一西壩本有票鹽公所向係販等辦公之地擬自開
售已已綱新鹽爲始遵照憲諭於豫徽浙蘇鎮淮海各
幫中每局選派一人分班輪流值日破除情面互相稽
查仍延請公正同事常駐公所專司其事凡有各棧發
賣之鹽務須恪遵定價由公所眼同三面交付不得私
相授受如查有暗增暗跌情弊卽行公同據實首報聽
候分別究罰 一湖販買鹽向來聽憑揀擇若挨輪出

售卽有鹽色參差不合湖販之便儻正陽需上鹽之時
適當西壩次鹽頂輪湖販勢必觀望不前轉於壩銷窒
礙應請查照陶文毅公會文正公先後定章悉聽湖販
擇鹽售買庶於疏銷裕課之中仍寓體卹販情之意
一各棧售鹽向歸棧房經手與湖販交易卽於某棧交
單註明某夥代售以便公所登簿隨時訪察如果不遵
定價私行加貼希圖肥己者一經發覺擬請卽將該棧
勒令閉歇永遠不准復開設有棧夥勾通局夥私增價
目瓜分中飽者卽提棧夥責懲押解回籍一面將局夥
驅逐出境通壩不許容留儻局主知情不舉有意徇隱

應請照章懲辦以昭炯戒而警玩忽 一各局到鹽堆
存何棧應先報明公所登簿備查出售之時亦卽隨時
知照公所派人前往監稱如有畸重畸輕之弊卽請分
司親臨抽掣照章懲辦以儆效尤而歸核實經鹽政李
宗義批該分司前擬設立售鹽公所挨輪派賣原爲保
固壩價起見茲據稟飭據各票販議覆淮北與淮南情
形不同仍主聽販擇鹽售買但求壩價不致暗增暗跌
自以仍循舊章爲妥所擬輪流稽查章程四條尙屬妥
協應卽責成值日之商認真稽查該分司亦應不時密
訪若竟徒託空言或有私行加貼情弊卽當稟請重懲

俾知警惕

光緒二年四月海分司于寶之詳淮北票鹽章程壩鹽公
售一條自前年奉飭在壩設立售鹽公所之後凡運場
鹽到壩皆係報由公所挂號出售之時亦歸公所先行
開除原所以便稽查今既分幫公捆將來運壩後亦歸
分幫公售運鹽到壩以及售賣開除仍照舊章先往公
所挂號由公所查核無訛開明包數加蓋圖記再赴錢
糧局開除所有售鹽斤兩遵照定章辦理並由公所派
人監稱以杜弊端經鹽政沈葆楨批允

光緒四年四月分司于寶之稟呈整頓事宜章程一條

鹽到堰責成局員督催多派稱手分頭捆掣毋許停留
圓載後勒令票販卽刻開行如無風雨阻滯限七日內
到壩五日回空卑職當派委員逐段催趲隨時查察儻
票販因循觀望卽屬有意誤運由局員指稟俟引鹽到
壩罰令停售俟全綱售竣再准啟封開售以昭儆戒經
鹽政沈葆楨批允

光緒八年三月職員王光華等稟爲援案請增鹽棧以敷
堆儲而便商販叩恩俯准飭遵事竊查淮北票鹽自兵
燹以後每綱運鹽二十九萬餘引至西壩銷售奉前督
鹽憲曾核定准開棧房十五家以便堆儲分銷並諭明

俟將來規復四十六萬引舊額之後再行稟請察核增
開棧房等因十餘年來遵照在案見逢侯中堂節蒞兩
江總理鹺政批准厚德昌等添運票鹽十六萬引計鹽
六十四萬包連同舊販所運之鹽共有一百九十餘萬
包之多僅儲棧房十五家不特有擁擠滯銷之虞且鹽
廩太稠恐有風火之患敢援曾文正公批定成案請增
鹽棧四家於裕國通商兩有裨益經鹽政左宗棠批准
北新增票鹽十六萬引一俟捆運到壩自應添棧堆儲
據請增設棧房四家核與同治六年程前運司報文內
聲稱將來加添額引再行核辦之案亦尙相符惟各該

商是否殷實仰准運司飭海分司確切查明取結詳辦
光緒十年閏五月西壩鹽棧同和等稟竊棧等各棧開設
有年堆儲票鹽歷無貽誤奉前爵閣督鹽憲曾核定十
五家不准增添有案溯查設立鹽棧伊始係在道光年
間改行票鹽經前督鹽憲陶通盤籌畫飭於西壩地方
設立鹽棧以便各票販運鹽至壩有所堆儲卽湖販來
壩亦必憑棧購買誠所以重視各棧保全商本續後任
意啟閉添至二三十家棧多鹽少百弊叢生因而紛紛
虧累商本遂於同治五年復經海分司督飭西壩卡員
查明票鹽存棧待售需時課款攸關商本所繫若不詳

定章程明示限制既難分別勸懲又恐棧多累販當按
每綱運鹽一百一十八萬餘包統計分儲十五棧以每
棧約可儲鹽八萬餘包爲率取具棧等的名年貌暨連
環互保各冊結詳由淮運司報明前爵閣督鹽憲曾定
案是棧等各舊棧設自陶而定自曾恤棧顧商兩有裨
益立法誠爲至善棧等恪守定章小心經理迨至光緒
八年開辦已卯綱加增新引遂各紛紛求請添設新棧
以圖射利始據職員錢慎西在於海分司衙門具稟奉
駁西壩舊設鹽棧十五家足敷堆儲乃王光華等續又
逕赴前督鹽憲左案下朦准添設利和興三益祥永隆

源協同泰等四棧專以堆儲新增引鹽爲名並未取具
棧等保結同送見值規復舊章新引既減新棧仍存日
久因循難免不蹈從前虧累故轍辛巳綱開辦在即若
不先事陳明將來必至紛累歧擾擬乞援照從前定案
飭將新設利和興三益祥永隆源協同泰四棧減除以
復舊制經鹽政曾國荃批查西壩鹽棧先定十五家左
爵閣前部堂任內增設四家尙不過多目前新引雖除
但求銷暢運速票販獲利鹽棧隨之不得率請裁棧致
啟把持之漸惟以後不准再行添設以示限制

兩淮鹽法志卷四十九

兩淮鹽法志卷五十

轉運門

掣驗上

引鹽之行從前有橋掣有所掣有江掣由場抵橋由橋抵所由所出江自儀河至浦口而止蓋綱鹽舊章也票鹽之掣未開江以前則有壩掣棧掣迨過儀徵十二圩上駛則有金陵之掣大通之掣湖口之掣武穴之掣此新章稍殊也今編綱鹽掣驗爲上冊編票鹽掣驗爲下冊而察溢斤夾私之弊則同云志掣驗

順治九年二月巡鹽御史張璿疏言督徵

國課首在鹽行不壅疏通引鹽尤在斤重無溢臣莅任以來准鹽壓運二年引課積欠數十萬屢行申禁乃從前掣法未修商胥通同作弊每鹽一引多至八九斤以上甚有多至二十斤者值茲鹽壅課逋之時何可不亟爲懲治按鹽法條例每夾帶鹽一斤應追割沒銀一分入官計掣過所鹽四十一萬二千三百三十三引多出鹽六百九十七萬七千六百四十七斤應追割沒銀六萬九千七百七十六兩四錢七分行運司追徵完解再各商遵照部頒則例每引徵銀六錢七分五釐四毫行鹽二百二十斤淮南加包索十五斤淮北加包索二十五

斤共計鹽一斤約徵銀三釐零嗣後掣驗一准大公趨利之商誰甘以一斤之鹽而當一分之罰則夾帶少而正鹽銷所慮弊去名存將來當事者按數取盈是臣防奸保課之苦衷反貽縱令夾帶之厲階伏乞

勅下戶部查照施行部議鹽政稱掣原以防夾帶之弊鹽法考開載有關掣有所掣有江掣如鹽逾引額掣出一斤罰銀一分立法甚嚴今該御史稱掣過鹽引多出夾帶鹽斤應追割沒銀兩自應照數解部再查場鹽抵關設有運同逐船抽掣查明無弊方准過關抵所今夾帶如許該運同何無稽查應令鹽臣嚴行申飭嗣後鹽船過關

務要照例稽查違者參處

謹按大引帶鹽二十斤小引止應帶鹽十斤此疏內以小引而帶大引之數與部議不合後被王秉乾參商多帶鹽十斤致累帶徵賠補詳見恤商

順治十四年五月巡鹽御史白尙登題覆戶科粘本盛條奏稱掣故地宜復一款查浦口在南省北岸係故明京城關引在京故於浦口掣鹽謂之京掣後因鹽船遭風議改儀徵舊港掣我

朝改京爲省故曰江掣查舊港地方內有深水可容萬艘外有蘆洲可避風濤江掣地方當於儀徵舊港爲便部

覆准行

順治十五年巡鹽御史高爾位題覆戶科粘本盛條奏關
橋割沒宜徵一款查南關之設原因明季商鹽過橋之
後上堆重捆然後過關抵所故設關稽考我

朝定制不用重捆鹽不上堆凡運抵北橋稱掣每溢一斤
納銀三釐議以公罪稱出鹽斤關橋官隨卽照數填報
按徵解部而南關則照北橋之數亦係每斤三釐填報
合關橋計之有每斤六釐之徵但關與橋相去數里撤
關歸橋誠爲便商六釐併徵無虧

國課再查關橋稱掣係運同專責欲杜其弊部發印簿每

日令商公同登記如衙役有需索使費名色許商人指
告部議撤關歸橋應如所議但科臣疏內有云關橋溢
斤六釐與儀所割沒一分同徵歲課盈餘必倍該御史
當竭力徵解以裕

國課仍將年終掣過溢斤並儀所割沒底簿一併繳部核
查至登記設簿應令該御史自行印發

順治十七年四月巡鹽御史李贊元奏鹽政壅弊之由一
在溢斤割沒斤重日增鹽法日壞蓋鹽從滷煎滷出則
斤自減滷從下漬下重則上自輕故火鹽出場前十日
之鹽與後十日之鹽斤重不等矣鹽堆艙口艙面之鹽

與艙底之鹽斤重又不等矣卽加有滷耗亦不能使之
畫一故於正額之外防其借端夾帶此溢斤割沒之所
由起也淮北之鹽出場抵所別無關津若淮南自場而
壩而橋迢遙數百里故先有關橋之稱驗其法每船一
艙掣驗一引多一斤罰銀三釐餘鹽俱照此數今關橋
併徵銀六釐原所以防夾帶之混淆也至淮儀二所掣
摯以二十引掣一引爲准式正額之外多一斤罰銀一
分亦不過恐其多帶滋弊割其所多之斤而沒之於官
嚴杜夾帶者不爲不密矣自溢斤割沒入有定額而司
掣各官遂以取盈爲名所在掣驗不知幾經官役幾經

需索而商鹽斤重將不可復問合橋所計之共銀一分六釐買鹽一斤成本既貴開私鹽賤售之門夾帶既多釀正鹽難行之漸此非割沒溢斤之爲弊乃取盈之數有以縱之逼之使良商不得不帶奸商乘機多帶之爲弊大也臣請以後凡商鹽抵橋抵所卽將臣給發印鈐底簿底馬同眾商秉公稱掣多少有無當面填註差滿之日底冊繳部查核如有需費隱漏情弊臣則不時糾參從重處分部覆如所請行

順治十七年六月巡鹽御史李贊元奏鹽政壅弊一在公罪之名不正溢斤之弊愈生查公罪中有違限公罪有

溢斤公罪違限者商人入場捆鹽限以四十五日到橋過限擬杖稽遲誤運加罪何辭獨是稱出溢斤一項除每斤罰銀六釐外又擬以杖不過嚴其法使無多帶然多帶此罪少帶亦此罪名爲嚴之實則寬之也臣愚以爲關橋稱掣之時有無多寡固當據實填報填至十斤以上者仍照例罰銀六釐至三十斤以上者罰銀復加杖五十斤以上者竟同私鹽之例則商知少帶罰輕多帶罰重法紀重而夙弊清戶部議覆關橋稱出額外多鹽一斤納銀六釐仍罰以公罪此舊例也今溢斤至三十斤以上方以公罪罪之則帶數斤者悉爲漏網於

例不合凡遇有溢斤每斤除納銀六釐外每商一名應遵照新例輸納公罪其多帶至五十斤以上者自應如議同私鹽之律庶法嚴而商人知儆可除夾帶之弊復經李贊元奏兩淮行鹽事例除正額外多鹽一斤在所罰銀一分在橋併關共罰銀六釐罰之卽所以罪之也自貪利之臣借名行私於六釐之外設爲公罪以巧取商財今部覆謂新例每商一名擬一罪其說固是但查兩淮綱冊有一名而四五千引者有一名而四五十引者且有二三十引者四五千引而問一罪猶可言也若四五十引及二三十引者在正課鹽本僅三四十兩又

納二十七兩餘之罪況綱中所載半非行鹽之的名當日認窩之後或亡或乏有一人而分爲數十名者亦有一人而帶銷數十人者如按冊擬罪恐數十人而夥認一人之罪吏胥之挪移詐騙姦商之規避營脫弊將不可勝窮且私鹽所擬卽至數千斤不過一徒折贖止十數兩今多帶一斤卽擬三十餘兩是無輕重也乞下戶部都察院酌議定例經部院會議溢斤公罪如輕議禁革恐滋奸商夾帶之弊如遵新例則微貲受極重之罪除多帶五十斤以上及三十斤以上者俱如鹽臣前疏所奏不論鹽斤多寡一體罰以公罪外其五十引以上

之商溢鹽三十斤以下者罪罰亦照新例五十引以下之商資本原徵若溢鹽三十斤以下者照前例每斤徵銀六釐外罰銀四兩

謹按嗣於康熙十六年准戶科給事中余國柱條奏盡革割沒溢斤公罪等名每引加鹽二十五斤加課二錢五分詳見商課

康熙九年十月巡鹽御史席特納徐旭齡奏兩淮積弊相沿大苦有六其一爲輸納之苦商人納課例將引數填註限單謂之皮票所以便商下場也而運庫扣勒皮票每引科費錢數不等方得給單而胥役又有使用謂之

照看綱總又有科斂謂之公匣除正納外必費一二錢始得築一引之鹽計歲費約數萬金其二爲過橋之苦商鹽出場例將艙口報驗謂之橋掣所以便商放橋也而關橋勒扣引票每引科費數分不等方得掣放而面鹽底鹽又有搜鹽之費斤多斤少又有買斤之費除溢斤外必費七八分始得過一引之鹽計歲費又約數萬金其三爲過所之苦商鹽呈綱例必造冊擺馬謂之所掣所以便商驗斤也而未經稱掣先有江掣之費一引數分不等又有茶果之費一引數分不等又有緩掣之費又有加窩之費除割沒外每引必費一二錢方能過

所計歲費又約數萬金其四爲開江之苦引鹽旣掣例
必請給水程每引數分不等又請給旄封每張數兩不
等以至報狀撲戳引各錢餘不等封引解捆引各數分
不等每引約費二三錢方能開行計歲費又數萬金其
五爲關津之苦鹽船旣放行矣而所過鹽道有挂號之
費營伍有巡緝之費關鈔有驗料之費計歲費又數萬
金其六爲口岸之苦船鹽旣抵岸而江廣進引每引道
費錢餘不等樣鹽每包數釐不等查批書房每船數兩
不等計歲費又數萬金此六苦者實爲淮商切骨隱痛
今新鹽方運恐舊弊復滋請

旨通行嚴革將各項私費名色立石永禁並祈

勅部確議成法責成見在鹽屬各官每歲所行額引凡輸納過橋過所開江放關口岸等項事竣仍取各商有無私費甘結繳臣衙門查核蓋一處有費商人卽不肯出結一處無結臣等卽據無結緣由指名題參嚴加處分以爲蠹國剝商之戒又淮鹽掣摯三大弊兩淮綱地節增食窩實有地狹鹽多之患故商人於正課尙且甯甘納課而不願帶鹽及橋所兩掣額外之斤反加增重實爲目前鹽法大害查橋掣盜斤所掣割沒罰例甚重所以禁多帶也自前鹽臣張瑋以多報割沒爲功每歲相沿爲

例掣官藉口加斤私既便於侵欺公又便於報解官以
多解爲利商反以多斤爲苦其弊總在於掣驗一爲加
鉅之弊掣官每藉餘斤虧額爲名不論鹽包輕重暗挂
斤兩商鹽非增捆額外不能與鉅相准每一引增至二
三十斤不等利歸於鉅而病中於商其弊一一爲坐斤
之弊掣官又藉合算底馬爲名不論斤重有無預定餘
鹽商鹽非多帶斤兩不能抵償掣費每一引帶至四五
十斤不等公斤愈多則私科愈重其弊二一爲做斤改
斤之弊商之奸良不一奸商斤多賂入可以填少良商
斤少賂不入亦可以填多掣官於未掣之先議定使費

暗做斤兩已掣之後議定使費又暗改斤兩於是斤多者納銀反少斤少者納銀反多輸納不均而害在於課且奸商之鹽日多良商之鹽日壅口岸不銷而害中於引其弊三此三弊者總緣厯年掣官假公濟私計餘鹽之利而不顧正鹽之害雖嚴加申飭弊終不革惟有請旨嚴禁斤重一法火鹽出場涵耗雖有參差斤兩原自無多乞部酌議定例凡橋所掣摯溢斤割沒少者三四斤多者七八斤不得逾額如奸商有夾帶過多掣官有虛填太重者商則將引目銃毀計引科罪官則將底馬核算計斤坐贓多帶之斤除則銷運易而商利均填註之弊絕

則掣驗公而

國法信部議覆准將六大苦三大弊等款嚴禁勒石立於橋所及經過關津口岸永行禁止如有管鹽各官違禁私派苦累商民該御史指名題參照律治以贓罪商役人等亦照例治罪若御史徇情不行查參或被該督撫及科道官等糾刻即將該御史照失察例治罪若該御史有巧行私派及搆同掣官侵吞等弊或該地方督撫及科道等劾奏或被受害人出首將該御史亦照律治以贓罪

謹按六苦不盡開掣驗以有名章奏不便割裂且久

經立石人所共知故全載於此

雍正二年閏四月兵部尙書盧訥奏從來鹽政以禁私爲首務然鹽之行與不行總在於鹽價之貴賤私鹽價賤而民食者眾官鹽價貴而民食者少夫官商私販均用貲本均費人工腳載乃官則貴價私則賤價者蓋私鹽多每斤多賣一釐卽屬餘利官鹽爲費數倍必照私鹽多賣數倍方有餘利卽完課一項不過十之一二而商人服食奢靡及各衙門額規總皆增於鹽價之上究其私販之盛行實官商之價貴毆之也商鹽之價貴以致壅滯者實官吏之規額爲之也是以欲使商鹽之盛行惟

在價賤使私鹽無利將不禁自止欲使商鹽之價賤惟絕規額則商鹽自通行而無滯臣愚以爲莫若加引而不加額大減其價如向行一萬引者原須二萬引方足敷用卽將一引分作二引須三萬引方足敷用者卽以一引分作三引而課銀仍只完原額之數絲毫不增儘其所賣皆成官鹽則地方官無所挾制鹽賤多賣則私販何所利而興販百姓何所利而食私此實正本澄源之要術也部議查各省地方有遠近戶口有繁簡時價有消長勢難畫一有鹽積不能銷者亦有地方濶大不敷賣者若此時但增引目不加課餉將來引不能銷勢

必減引而錢糧亦隨減去是加引斷不可行查去年長蘆因積欠錢糧甚多已據該御史莽鵠立奏請蒙

皇上格外施仁每引加鹽五十斤免其增課惟兩淮地方額徵錢糧甚多而歷年積欠錢糧復有一百三十餘萬兩今若亦照長蘆之例令其每引量加鹽斤則商人自必獲利而錢糧積欠自必易完應令兩淮鹽政謝賜履確查行鹽各處有地方濶大鹽不敷賣之處每引加鹽若干確議具奏是年九月經

欽差戶部侍郎李周望等奏兩淮所行之鹽有地方濶大而鹽不敷用者如湖廣江西江南上江是也有逼近場竈而

鹽不易售者如淮安府屬之山陽清河桃源宿遷睢甯
沐陽贛榆七縣邳州一州揚州府屬之江都一縣是也
今若概照長蘆之例每引加鹽五十斤恐將來鹽多不
能銷售勢必至引壅課虧應如副都御史謝賜履所議
湖廣江西及江南上江等處淮其每引加鹽五十斤山
陽等八縣邳州一州不必加鹽仍照舊例遵行又謝賜
履奏稱加斤之處請自癸卯綱爲始鹽已開行者給批
補運查癸卯綱鹽見在開行已多若給批補運恐致紛
更應自甲辰綱爲始凡應加斤地方俱照數稱掣俟一
年後果於商人有益

國課無虧卽著爲定例部覆應如所議加鹽以甲辰綱爲始但見今場竈海潮漂沒甲辰綱引鹽恐一時未能煎辦議將甲辰綱鹽斤或於乙巳丙午兩綱帶辦或可與乙巳綱併年煎辦行令該御史議覆四年二月巡鹽御史噶爾泰疏覆癸卯一綱鹽完課足依期奏報並無帶辦併煎之處甲辰一綱自可按年完額請自甲辰綱爲始部議准以甲辰綱爲始每引加鹽五十斤一年之後於商情

國課果均有益卽著爲定例將來或有地方不能行銷之處該年巡鹽御史卽行題奏酌量裁減毋得強派勒加

以致鹽壅累商

謹按雍正十年兩江總督尹繼善據運使范廷謀詳
批示淮北食鹽原與綱鹽一例從前不准加斤之議
實屬偏枯以致各商畏綱官引不銷今地方實力緝
私督令行銷尤宜鹽斤寬裕俾價值減少以賤敵私
應照綱鹽斤重一例捆運仍候於辦理鹽政事宜疏
內一併題明又批准江都食鹽亦飭照綱鹽例一體
捆重

雍正六年十一月部覆江南巡察御史戴音保條奏一泰
壩之叢弊宜除也查場竈所產鹽斤皆揚商出本買運

捆包之後必由泰州稱准過壩然後運至儀徵待掣在
泰壩俱有輕理之人曰壩客有持衡之人曰損頭又有
喝報之人曰先聲此輩係揚商出銀煩其料理豈知若
輩見利忘義每與屯駁等船戶勾通遇場鹽到壩稱量
斤重之時往往以多喝少留其餘地爲販賣之資其所
少斤兩仍責揚商補償所以商本日虧私鹽日熾雖舊
例嘗委微員在壩查察不知微員不能彈壓而壩客諸
人曲意趨承往往爲其所賣嗣後請飭就近大員專董
其事查壩客損頭先聲等人旣非官役又非額設自應
驅逐裁汰行令江南督撫及兩淮巡鹽御史將此項人

等名色悉行革除官爲招募練達誠實之人充當並就近責成大員專理其事俟場鹽運至泰壩親詣河干驗明引目眼同按引稱量如有勾通情弊俱照興販私鹽例治罪其多帶鹽斤照數變價入官儻該員縱容徇隱聽巡鹽御史指名題參

乾隆五年二月運使徐大枚據商稟議詳引鹽過所入垣所經之地多有男婦偕埽鹽爲名三五成羣或勾串攬夫扯破包索任意爬搶雖有商廝巡查而彼眾此寡防範維艱請委專員幹役在所前所後巡邏各商每引願捐市平銀一釐二毫以爲委員薪水巡役工食之費議

於儀所衙門添設巡役十二名本關委員設立巡役十二名儀徵縣典史設立巡役四名每名月給工食銀一兩二錢又引鹽自所至垣沿途設立代巡人役十六名每名月給工食銀七錢五分儀所督巡薪水銀每年三百兩房租銀四十八兩儀徵縣典史每年飯食銀一百二十兩各商於釘封引目時交納所官按季彙解監掣廳兌收給散巡鹽御史三保批允

乾隆三十三年十二月鹽政尤拔世奏通州運判所屬豐利等九場泰州運判所屬富安等十一場各商捆鹽俱雇場船運至泰壩稱掣另行雇換屯船運赴儀所此舊

例也茲據通州運判陳洪緒以通屬各場與儀徵一水相通非如泰屬各場中隔泰壩必須過壩換船請將通屬場船到壩抽驗之後仍以原船轉運免其更換屯船以省臺運拋撒臣隨飭據運使議以通屬九場鹽船順道至泰壩南關查船處所令該壩官就近抽查驗放其稱掣給票填簿等事悉照舊例辦理奉

硃批知道了欽此

乾隆三十九年九月鹽政李質穎奏本年八月老壩口黃水漫隄淮所堆儲未掣鹽四萬九千餘併引皆被淹沒其已掣裝船鹽二萬五千餘併引及由場運淮在途鹽

八千餘併引亦多漂失應俟水退查明淹消確數飭商照例補運以足歲額查淮北引鹽向由各場運至黃河北岸之永豐壩盤驗過壩然後運至淮所稱掣分往各口岸行銷今淮所水未退涸不能剋期稱掣臣見飭將平鉞暫移黃河北岸卽於永豐壩稱掣上船運往各岸俾資接濟一俟水退仍歸淮所掣驗奉

硃批覽奏俱悉欽此

乾隆五十四年八月鹽政全德以江甘捆溢鹽斤年終通扯配割套積因循易滋弊竇行據運使鹿荃議詳查淮南綱食引鹽向係請運正鹽後卽酌數完納錢糧預請

皮票俟正鹽將到稟驗票本請領引目發儀備割其江
甘食鹽向無請存割引之例自應畫一辦理惟查江甘
食鹽資本微末每票不過二三百引配割零星應聽各
商隨時酌量預請存儲配割仍於投請割引之時卽完
足請呈加錢糧將三項銀票並硃單一併投司循例出
給花名引單發商持赴庫大使領引投司臚印卽將引
目銀票填具照單呈院查核引目銀票分別註銷祇將
照單用印發司飭發知事查照配報一面查照照單引
數另給諭單發商憑赴知事衙門按票註明配割俟照
單內引數割竣由知事申繳運司核明轉呈鈔銷俾錢

糧不致貽誤而辦理章程亦覺捷便經鹽政全德批允
乾隆六十年六月鹽政蘇楞額奏准北商疲運滯請推廣
併引之意酌以四併引灑帶一併引每包於額捆斤數
之外加入一百八十二斤共重九百一十斤加砵稱俾
以節運費每包灑帶之鹽仍按斤納引一同完納錢糧
經部議准試行嘉慶十年四月鹽政佶山奏四併引帶
一併引原屬推廣併行之意但每一併引止帶半單引
所帶無多運本仍未能大省仰懇以三單引併爲一包
運行則捆工等項更得節省自乙丑綱起按包捆運試
行三年再請定例經部覆准既有成效自當卽以此次

所請加包之數作爲定額無庸復展試行嗣後亦不得再有增加奉

旨依議欽此

嘉慶元年二月戶部札覆鹽政蘇楞額呈稱奉部行查楚鹽八斤四兩爲一包西鹽七斤四兩爲一包其捆築之時是否淨鹽抑或連包索在內令卽查明報部遵查淮南捆運引鹽每引額重三百四十四斤係連包索在內照額解子每包亦連包索計算是以水程引皮票內俱有連包索其解小包若干字樣相應咨覆查淮南運銷楚西正鹽三百四十四斤改捆小包該鹽政旣稱係連

包索在內應毋庸儀但查每引例加耗鹽二十斤是否亦係改捆小包連包索在內按引帶運仍令該鹽政查明報部嗣經呈覆淮南例給耗斤係奏准之案五六兩月每引加耗十五斤七月十斤八月五斤九月秋涼停止歷來遵辦以補滷耗並無例加耗鹽二十斤惟乾隆十三年欽奉

特恩加鹽十斤免其增課乾隆十六年

聖駕南巡

特恩加鹽十斤永遠爲例兩次計共加鹽二十斤乃係

恩加之鹽在額斤三百四十四斤之外均係一體改捆小包連

包索在內按引帶運部覆令將每年四箇月加耗原奏
及

恩加鹽斤

諭旨鈔錄送部查核復又行據運司錄案詳咨

謹按兩淮鹽引

國初仍明之舊惟剖一爲二每鹽一引額定連包索二百
二十五斤又解費納銀一分六釐加鹽二斤繼於康
熙十六年戶科給事中余國柱請革去割沒溢斤公
罪等名色於額引攤派每引加鹽二十五斤加課二
錢五分又自康熙三十八年起至五十二年節次加

添河餉銅斤織造等銀三十二萬七千六百二十兩
每引加鹽四十二斤雍正四年五月於兵部尙書盧
詢條奏案內戶部議准加鹽五十斤免其增課乾隆
十三年二月因鹽政吉慶奏請蒙

恩於引額之外加鹽十斤亦免其增課乾隆十六年二月又欽
奉

特恩賞加十斤不在原定成本之內是時兩淮綱食鹽每引以
三百六十四斤爲額

附掣規

雍正十一年兩江總督高其倬管理鹽政高斌先後批定

綱食引鹽掣摺進垣每垣設立編號垣簿一本凡引鹽進垣分晰新殘堆儲簿內逐一登填某旗第幾堆某花名某日過所某綱正鹽割引各若干又於每鹽堆懸挂木牌一面照簿書明引鹽解捆時卽於簿內牌內註明日期包數一面照造清冊詳查並令商人刷備駁船發票由儀所鈐印發票內亦註明某旗某字號某日捆駁某口岸若干包某駁船戶運送某江船受載仍於駁船上用布旗大書某旗號駁船字樣至出江所由之黃泥灘鐵鷁子二處添設委員於總口盤查以防夾帶偷運該委員查畢登記三日一次造冊移交儀所與垣簿較

對清晰具文轉申

乾隆四十年九月淮南監掣同知張景宗稟儀所掣規向
用尖角大旗立於石馬擡鹽時插旗人役每包插小方
旗並官籌一根各照旗色排列大旗之下謂之擺馬其
包上小方旗內均書明一號至二十號掣籤筒內亦照
各旗色號數立有竹籤各二十根迨鹽排齊全插旗人
役執小尖旗稟報某色已全鹽掣廳卽於此色籤筒內
抽出一籤籤列幾號卽擡掣幾號之鹽二十引爲一馬
一馬之中抽掣一引以概十九引之輕重而某二十引
爲某一馬恐有混雜故設旗分色以爲辨別與鹽法志

內所載舊規約略相同今奉鹽院面諭過掣用旗無關
鹽引掣摺之義應行更易查引鹽擡掣之時號旗之外
插有木籌其色與旗相同請嗣後將從前用旗之處均
改用籤第恐損夫眾多鹽引紛擡之候致有錯誤應將
各籤仍分顏色俾令一望而知舊規係黃綠紅紫白青
藍花八色八正八鑲今擬改爲黃綠紫白紅青藍七本
色杏黃翠綠銀紅瑰紫魚白紅青寶藍七間色其原用
正花鑲花者今改爲方花圓花二樣並改石馬所立之
大旗爲牌籤引包所插之小方旗爲號籤稟請抽掣之
小尖旗爲提籤筒內抽出叫號者爲掣籤原設旗籌人

役改爲籤籌人役經鹽政伊齡阿批允

乾隆四十九年七月運使倉聖裔詳向來江甘鹽運到
由白塔河巡檢塔報後給以引單運商持赴庫大使
門領引投司請印仍給該商呈院發掣層層轉折有需
時日嗣後請於塔報時運司給發引單交商赴庫領引
隨即投房釘封蓋印同底馬一併申司呈院發掣無庸
再行發商致滋延擱經鹽政全德批允

謹按以上皆嘉慶志所載綱鹽掣驗舊制茲仍錄存
以下所續皆票鹽見行新章

兩淮鹽法志卷五十